

14 JUL 2003

MAHATHIR-PERDAGANGAN/I

UKRAINE BOLEH JADI PUSAT BARANGAN M'SIA, KATA DR MAHATHIR

Oleh: Mohd Kamel Othman

KIEV (Ukraine), 14 Julai (Bernama) -- Perdana Menteri, Datuk Seri Dr Mahathir Mohamad berkata, Ukraine boleh menjadi pusat yang sangat baik untuk mengedarkan barangan Malaysia di republik itu dan negara-negara lain di timur Eropah.

Begitu juga, Malaysia boleh menjadi pusat bagi barangan Ukraine bagi pengedaran di rantau Asia Tenggara dan Timur Jauh.

"Malaysia adalah negara perdagangan dan kita mencari rakan untuk mengimport dan mengeksport barangan kita," katanya pada sidang media bersama dengan Presiden Ukraine, Leonid D. Kuchma, di Istana Mariinsky, pada Isnin di sini, di mana kedua-dua pemimpin negara itu mengadakan rundingan dua hala.

Dr Mahathir, yang sedang dalam lawatan rasmi selama empat hari ke sini mulai Ahad lalu berkata, walaupun pada masa iniimbangan perdagangan menguntungkan Ukraine, ia boleh diperbaiki lagi jika kedua-dua negara berusaha keras.

"Dagangan Malaysia memperlihatkan lebihan sejak 57 bulan lalu. Walaupun dagangan itu menyebelahi Ukraine tetapi jika kita bekerja keras, khususnya dengan minyak sawit dan pemberian kredit kepada republik ini, kita akan dapat mengimbangnya, malah mencapai lebihan," kata Dr Mahathir.

Pada masa ini, Malaysia mengimport baja dari Ukraine. Jumlah dagangan antara kedua-dua negara tahun lalu hanya berjumlah AS\$83.1 juta (RM315 juta).

Perdana Menteri berkata, Malaysia mempunyai banyak barangan dikilang yang belum dipasarkan di Ukraine.

Beliau berharap, pada masa akan datang, dagangan antara kedua-dua negara akan bertambah baik.

Dr Mahathir berkata, Malaysia menyokong keahlian Ukraine dalam Pertubuhan Perdagangan Dunia (WTO) yang beribupejabat di Geneva dan menjangka dapat bekerjasama dalam pertubuhan itu.

Dr. Mahathir juga berkata, presiden Ukraine telah bersetuju untuk melawat Malaysia.

"Semuanya sudah sedia bagi menjalin hubungan yang sangat rapat antara Malaysia dan Ukraine dalam semua bidang," katanya.

Beliau menambah kata, Malaysia bercadang untuk menubuhkan kedutaan di Kiev sebagai balasan kepada penubuhan kedutaan Ukraine di Kuala Lumpur tahun lalu.

Sementara itu, Kuchma berkata, beliau kagum dengan cara Malaysia mengatasi krisis kewangan yang teruk melanda beberapa negara di rantau Asia Pasifik pada 1997/98.

"Malaysia merupakan satu-satunya negara yang dapat mengatasi krisis. Bagi saya, memang menarik mendengar pengalaman Malaysia," katanya. --

BERNAMA

MKO FR KY NHD